



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 7

Nütsüing cr. 140-i Bangladesh nung Hindu nunger atema shisabulur

Thailand ato kilonser inyaktsü Paetongtarn Shinawatra shimogo



VOL. XXI ISSUE NO. 305 (ADOK 305) DIMAPUR KÜPTOKNÜ (SATURDAY) LUROI (AUGUST) 17, 2024 ₹ 5.00

CNSA-i ILP inyakyim akangshitsü ayongzüker

Dimapur, August 16, 2024

(TYO): Bangladesh nung yimtenren tensa ajanga India nung nisung aika arua jenoktsü akok aser talisa iba tebilemtsü ya North-east tesem nung ajurutsü ta Central Naga Students' Association (CNSA)-i metetdaksüogo.

Nagaland telungi aiter ajak maitsü jangjaba aser Inner Line Permit (ILP) ajanga registration system tenzüksüta. Maneni Naga nunger dang ozüing alema arurtem ajanga timtem bentsür aruba osang tejangja sangdongtsüla, kechiyong osang tejangja metet nung dang loktii iba mapa nung amalitepa yariteptsü ta CNSA-i ashi.

Home Department-i anir Nagaland state sorkari iba tebilemtsü asoshi temulung agütsütsü aser asen state o nübortem kümzüka ayutsü nungdakba meratem agütsü temulung alemer, ta

parnokisa ashi.

Iba tebilemtsü atema mapa kecha meinyakra lisopur asoshi timtem aika bentsür arutsü. Nagaland dena North-east state aika nung Bangladesh nungi nisungtem aruba khuret anema inyaka arur. Mokokchung, Wokha, Niuland aser Dimapur district tem ajanga Assam den arrtsütepa lir aser Bangladesh nungi ozüing alema arurtem khuret atema Assam nung tanen makai mapa inyaka arur, ta CNSA-i ashi.

Asenoki mapa takang kar meinyakra ozüing alema arurtemi asen lima asüingtsü aser iba ajanga mepetmesü adoktsüsa tensa ajurutsü. Anungji state sorkari central agencies den amalitepa arrtsülen ozüing alema arurtem noktangsü asoshi security mapa tenzüksüla, ta CNSA President R. Sunep Pongen aser General Secretary Anoka H Zhimo nati sangdong ka nung ashi.

Bangladesh nung Hindu aser minorities kümzüka ayutsü nangzüker

New Delhi, August 16, 2024

(Agencies): Bangladesh-i Hindu nunger aser minorities ajak kümzüka ayutsü aser security agütsütsü nangzükerogo ta Prime Minister Narendra Modi-i Hokolbarnü metetdaksü.

Bangladesh interim government nung chief adviser Muhammad Yunus-i pa den jembidang iba ya nangzüker ta PM Modi-i ashi.

"Tanü Professor Muhammad Yunus nungi telephone call ka aru. Iba mapang küna tensa indang tebilembatem lemsatop. India-i Bangladesh nung democracy, timi ketdangsüba aser tejakleni aoba sorkar pusemer ta pa dang shiogo. Pai (Yunus) Bangladesh nung Hindu nunger aser minorities ajak kümzüka ayutsü nangzükerogo" ta Modi-isa ashi.

Mongulbarnü Yunus-i Dhaka nung aliba Dhakeshwari temple semdangdang Hindu nunger ayongzüka jembi.

Prime Minister Sheikh Hasina atsüingdokba sülen ozüing alema inyakdang minorities amakertem merenshitsu ta Yunus-i nangzüker.

Bangladesh tesem balala nung Hindu nunger aser tanga minorities amakba noksa aser video aika prokshia liasü. Kar nungbo tekülem kitem raksatsüba aser tebur o tetsürtem dak teka sangshiba nguogo. Ozüing alema inyakertem Indian Cultural Centre samatsü aser ISKCON temple dena tamangba reju aika raksatsüogo.

Opposition lennir aser Congress MP Shashi Tharoor-ia Bangladesh nung Hindu nunger amakba aitsüogo.

Bangladesh den medemer ayimba maitsü ajak nung kongshir anungji India nung alirtem tebilemba melenshitsu akümer ta Tharoor-i ashi.

"Kanga dang democratic aser nungtugu revolution ka ta tenüngsang agütsüba nungi tazüokba maliba tensa ka akümba atema sasar, minorities aser Hindu nunger amakba atema temulung raksar. India nung alirtemi Bangladesh den noktaksüla saka Bangladesh den medemer ayimba maitsü ajak nung kongshidang onok tebilemba melentsüsa akümer" ta pai ashi.

Mongulbarnü Hindu nunger ka samaba atema kinungertem Jamuna State Guest House kima lungkak aitdang Bangladesh army den mangatettep adoka raratep. Dhaka nung aliba Guest House nung chief adviser Muhammad Yunus alir.

Arishi küm 76 tain Sheikh Hasina-i küm 15 tashi Bangladesh madak yimsü süa arur Prime Minister menden toktsütsüsa aküm.

1971 Bangladesh Liberation War nung rarartem kibong asoshi civil services jobs nung 30% mekazüka ayutsü quota system tenzüksüba ajanga kaketsürtemi anir lungkak aityonga arur tatem nung Hasina-i aniba sorkar atsüingdokogoo.

Linük ajungalen ghonda 24 'hospital services' shibanger



RG Kar Medical College and Hospital, Kolkata nung doctors aser kaketsürtemi lungkak aitba angur.

Kolkata, August 16, 2024

(Agencies): Indian Medical Association (IMA)-i Honibarnep 6:00 ako nungi tenzüka linük ajungalen hospital services ghonda 24 shibangtsü ayongzükerogo.

Kolkata hospital ka nung trainee doctor ka dak tashiyim agi shi nung medemba aser tepsetba sülem IMA-i iba sentong ayongzüker.

IMA-isa takhangba onük aika agütsüogo aser iba nung hospitals ajak 'safe zones' ta züingsemtüba dena lir.

Kolkata nung trainee doctor ka dak tashiyim agi shi nung medemba aser tepsetba lendong sülen linük ajungalen lungkak

aityonga arur. IMA-isa RG Kar Hospital nung nisung telok kati ozüing alema inyakba aitsüogo.

"RG KAR nung atalokba ajanga hospital nung ozüing alema inyaksangshiba ana sayuogo. Tetsürtem kümzüka ayutsüla maparen maliba aser organised security protocol maliba ajanga nisungtemi ozüing alema inyaksangshiba sayuogo" ta IMA-i ashi.

IMA-i ghonda 24 lungkak aitdang medical services ajak anentsü saka essential services inyaktsü aser casualty wards lapoktsü ta IMA-i metetdaksüogo.

"Draft Hospital Protection Bill nung 2023 küm onük kar

yanglushiba enoksema Central Act ka yanglutsüla" ta IMA-i takhangba agütsür.

Parnokisa security maparen tajungba aser mapang talanglang mapa inyakba medical professionals nem facilities tajungba agütsütsü akhanger.

IMA-isa Kolkata nung trainee doctor tepsetba atema tekaratiba nung bushisüingdang asütsü aser lar kibong nem teyari agütsütsü takhangba agütsür.

August 16, 2024 nü West Bengal Chief Minister Mamata Banerjee-i anir tetsür doctor atema temeten meshia lungkak aitba sentong ka agiogo.

"Iba ken o nung tai tonglokja aliba nisung nem tasüba temerenshitsu agütsütsüla" ta Mamata Banerjee-i tanü ashi.

"Onoki ochi yimjak nung adokdaksünür ajisüka nisung kari public anisatsü atema tiyazü prokshir. Iba tatalokba ajanga ni temulung rongsar. Ni aonung sangwa kazü aser temulung kanga raksar. Buddhhabu asüding ni par kidangi ao. Ni ya politician ka saka ajak dang temaba ni humanitarian ka lir. Left aser BJP tsüingda miim tangatettep ya yimjak nung sayutsüla" ta Mamata-isa ashi.

Assam Police-i Rs 5 lakh senpet agütsütsü nangzüker

Guwahati, August 16, 2024

(Agencies): Assam nung ULFA (I)-i tesem balala nung bomb yutsüba bushisüingdangba nung public teyari nungdaker ta Assam Police-i metetdaksüogo.

Assam police-i kuli tejangja agütsür nem Rs 5 lakh senpet agütsütsü metetdaksü.

"ULFA-i bomb mesükba devices yutsüba ateam bushisüingdangba nung public dang nungi osang meshir. Item devices yangluba, belenba aser yutsüba nisung tenüngtem agüjang" ta Assam Police-i ashi.

Osang sangoktsür maitsü miimbanga dang ayutsü ta parnokisa ashi.

Assam Police nem WhatsApp Message: +91 91 326 997 35 mesüra Social Media Handles * Facebook: www.facebook.com/police.assam, * X(Twitter): www.x.com/assampolice aser * Instagram: www.instagram.com/assampolice ajanga osang sangoktsütsü akok ta parnokisa ashi.

United Liberation Front of Asom (Independent)-i Independence Day nung pokdaksütsü atema tesem 24 nung bomb yutsü ta sangdongba sülen Assam Police-i Brihostibarnü district pungu nung "explosive-like" materials

ngutetogo.

ULFA(I)-i tesem balala nung bomb yutsü saka "technical failure" ajanga mapok ta email ka ajanga metetdaksü.

Independence Day anepdang 6:00 ako nungi anüingdang tashi apoktsü atema tesem balala nung bomb yutsü saka mapok, iba jagi public-i bomb tem bushia raksa endoktsü teyari meshir ta ULFA(I) ashi.

"United Liberation Front of Asom (Independent)-i tesem balala nung bomb yutsüba osang sangoktsüba sülen Guwahati kübok tesem ana nung IED mesükba devices nguogo" ta Guwahati Police Commissioner Diganta Borah-i tanü ashi.

Yashi nikongdang nungi Guwahati dena Assam kübok tesem balala nung IEDs yutsüba osangtem prokshir. Guwahati nung tesem 8 nung IEDs yutsüba osang tejangja onoki angazükogoo ta pai ashi.

"Ozü ketdangsürtemi tesem ti mita ao aser idangji tesem trok nungbo kecha mengutet saka Panbazar o Gandhi Basti nung IEDs mesüka angu" ta Diganta Borah-isa ashi.

Police-i circuits, detonators aser explosives mesüka angu saka ignition mechanism maliasü. Ajisüka chemical analysis agiba sülen ang osang tejangja metettsü

ta pai ashi.

Bomb telung nung aliba forensic examination atema yokogoo aser tanüingba parts raksa endokogoo ta Assam DGP G P Singh-ia ashi.

Assam CM Sarma-i mepishir

Assam Chief Minister Himanta Biswa Sarma-i Brihostibarnü Paresh Baruah dang Assam nung arua mapa balala inyakertem tsübudaktsütsüsa mapa meinyaktsü mepishia metetdaksüogo.

"TATA-i Assam nung semiconductor industry bener aruogo aser ano ibala mesükba mapaaika arutsü. Küm aika sülen Assam-i tejakleni aoba aser terenlok angur. Ni Paresh Baruah dang Assam nung tensa meraksatsü mepishir" ta CM Sarma-i ashi.

"Assam nung zünger mapa manguba lanur lakh 14 jungnüa lir. Assam nung industry melira asen lanurtem Karnataka aser Andhra Pradesh nung security guards ama inyaki aotsü. Assam lanurtem Assam nung melira asenoki shirnok den Assam renlok daksütsü mesüra independent kümdaksütsü? Assam nung arua senotsü endoka shishilembartem asoshi tebilemtsü bentsür marutsüla aser ni olemtep alitsü yongyar" ta paisa ashi.



Nagaland Angh La Ganesan-i State Level Bankers' Committee (SLBC) Nagaland ketdangsür - Convenor, SLBC, Nagaland, Hubert A. S. Wungshim aser Coordinator, SLBC, Nagaland, H. Lalhlimpua nung den August 16 nü shisadokden senden ka amendang tangokba noksa nung angur.

GPRN/NSCN ya nübur indang sorkar lir: Jungshiwati

Dimapur, Luroi/August 16 (TYO): GPRN/NSCN (Mhathung, Kitovi) telok August 14, 2024 nü 5th Mile, Chümoukedima nung 78th Naga Independence Day munga liasü, kong ketdangsür, civil society aser temulunger nisung 500-600 shi dena liasü. Iba sentong ya Hokiye L. Awomi (MRA Kilonser) ajanga sarasadema tenzük aser Jungshiwati (Deputy Ato Kilonser) ajanga nisan asong aser iba sülen kilo kilonser Hukavi Yepthomi-i pela agizükba o jembia liasü. Deputy ato kilonser Jungshiwati-i sentong nung jembidang, nüchiso asoshi takum bendang agütsür nem akhum agütsü aser kodanga mamadoktsü, ta ashi. Tanü asenoki 78th Naga

Independence Day amungdang asenok ya tashi anir aruba asenoki bilemtetti. August 14, 1947 ya anogo balaka lir aser India nung dang anogo ka tama British nung ket nungi nüchiso sangdonga 'chapter' tasen ka tenzük, ta pai ashi. World War II mapang nungi Naga nung sovereignty aser pei sasa yimsü asütsü yimyatem kanga junga melenshia arur. Tanü political independence aser economic independence ya kasa lir aser arok mangdang aser nukjidong ajanga tajungba kumogo, ta ashi. Iba yongji November 17, 2017 nü Working Committee, NNPGs ajanga GOI den Agreed Position nung meyongnem agütsü, koba Naga nung pei sasa yimsü

Day asütsü yimten aser puti otsü temeden nung amendaka lir aser Naga nung puti aser yimten temeden nung metangshii yimjung nung külemi alitsü atema telok anaprongi kanga junga jembir October 31, 2019 nung ken o tembangogo ta sangdong, ta Jungshiwati-i ashi. GPRN/NSCN ya nüburtem indang sorkar lir, aser Working Committee, NNPGs indang tongti shilem ka lir. Tatalokba balala ajanga asen sorkar inyakyim nung timtem agütsütsü merang, saka tanü tashi takok nung nokdaka lir. Tatar Hohos, Cabinet aser Naga Regions temi memetet tamendak dak makai mapa nungi anenja nüburtem mangmangdaksü, ta ashi. (Maneni tapak 8 nung...)

UNISED-i Dimapur nung tesayur atema workshop ayongzük

Dimapur, Luroi/August 16 (TYO): Government of India indang flagship programme Viksit Bharat 2047 nukla den lirumedema UNISED-i Oil and Natural Gas Corporation (ONGC) den lungjemer Government High School, Darogapathar, Dimapur nung August 9, 2024 nü Government School ter nungi tesayurtem asoshi Atal Tinkering Mission indang capacity building workshop ka ayongzüka liasü. Tejangraba aliba tesayurtem mulungjang nung metetnüba aser tensa balala nung kanga

shisadangba adokdaksütsü nukjidong nung iba sentong ya ayongzük. Corporate Social Responsibility (CSR) nung shilem ka ama ONGC yagi Dimapur district nung Atal Tinkering Labs ter tashi sponsor asür aser Unit of Science & Education Development (UNISED) ya implementing agency amai lir. Iba training ya Avaneesh Tripathi, Senior Policy Advisor of National Innovation Policy & Chief Mentor, UNISED lenisüba kübok agia liasü.

Iba sentong nung GHS Darogapathar indang Headmistress, Thechano Patton-i kaketshirtem dang asüng tayongzükba balala koktettsü asoshi asangsang nung shisadanga inyaksü ayongzük. New Educational Policy nung shia aliba nukjidong nung tali rangloker iba sentong ya agi, kong NIPUN Bharat, Padhega Bharat, Badhega Bharat aser United Nation endorsed Sustainable Development Goals 2030 amala indang angatetdakja liasü.



National Institute of Technology Nagaland nung August 14, 2024 nü Ministry of Youth Affairs and Sports ajanga Master Trainers Training Program on MYBharat Portal sentong ayongzüka agia liasü. Iba sentong nung state tesem balala nungi NSS Program Officers 55 tashi dena liasü.

Pughoboto nung Soil Testing Laboratory lapokogo

Dimapur, Luroi/August 16 (TYO): State nung Agri aser allied inyakyim tali ajungketshia MLA Imtichoba Chang-i Zunheboto District kübok Pughoboto Subdivision nung Static Soil Testing Laboratory (STL) ka August 15 nü lapoktsüogo. Iba lab lapokba sentong nung ADC Tiameren Chang aser SDO (S&W) Dr Alika Zhimo nata densema liasü. Ministry of Agriculture & Farmers Welfare, Government of India aser Government of Nagaland nati senotsü teyari agüja iba lab ya lapokogo. STL

ya Rashtriya Krishi Vikas Yojana (RKVY) kübok Soil Health Card scheme kübok amenokogo. Iba scheme kübok aluyimertem ali tendanger aser Soil Health Card (SHC) lemtsür, kong N,P,K (Macro-nutrients); S (Secondary- nutrient); Zn, Fe, Cu, Mn, Bo (Micro - nutrients); aser pH, EC, OC (Physical parameters) ta parameters 12 dak sendakba nung ali jenjang indang osang keta lir. SHC-isa fertilizer recommendations indicate asütsü aser alu atema soil amendment nungdakba sayutsü.

KPC-i Independence Day nung District TB Hospital semdang



Kohima, Luroi/August 16 (TYO): 78th Indian Independence Day mapang tesem balala semdangba nung shilem ka ama Kohima Press Club (KPC) ajanga August 15, 2024 nü District TB Hospital Khuzama semdanga liasü. Iba mozüki nung shiranger nisung 7 lir aser parnok rongnung ka Burma nungi lir. KPC-i iba mozüki semdangba mapang shirangertem den sensaksem aka aser parnok nem nungdakba osettsüset agüja liasü. Metetpela mapang tatsüka agidang, KPC züngsemtem küm tepiyong osang abenba mapa inyaka aruaka Independence Day nung nüburtem asoshi mapa tajung inyakba nung shilem agitetba ya pelar, ta KPC tongti zülur Vishü Rita Krocha-

i ashi. 2018 küm KPC züngsem temi kasa tesem semdangba lai bilemteta jembia aser manemer tem tekeraba nung taneptsü angutsü sarasademtsür, ta KPC tenüng nung lai ashi. Senior Journalist & KPC Member, H. Chishi-i shirangertem den tajungshi o jembidang, akhidang TB ya jetsübotsü tashidak ka ama bilema liasü, saka mozü tajungba yanglutetba ajanga iba tangatetba melenshiogo, ta ashi. Pai manemertem dang mapang shidak nung mozü achitsü aser doctor-i ashiba shidak inyaksü ayongzüka liasü. Iba sentong nung Medical Officer Dr. Kekhrievor Suohu-i mozüki indang tongmelang agi lemsatapa liasü.

Methaneilie-i August 18 nü Nagamese ken "Mobile Phone" sayatsü



Kohima, Luroi/August 16 (TYO): Ita pongu lir nungtugu Nagamese aser Tenyidie ken atener Methaneilie Jütakhrie Solo aser band ajanga Nagamese ken "Mobile Phone" sayatsü. Iba music video ya YouTube nung August 18, 2024 nikongdang 1:00 ako nung sayatsü, ta Methaneilie-i ashi. Tanü putu nung lanurtem ya mobile phone nem anishidaksür, kong tajunga lir

aser tamajunga lir, ta pai ashi. Mobile phone tali amshiba ajanga pei mapa shidak meinyakteter aser tajungtamajung asen den teti külemi jajar, anungji lenmang shidak shimtsü asen mapa lir, ta ashi. Item tensa asadanger iba ken ya mejem, ta Methaneilie-i ashi. Iba ken ya ajanga nüburtemi mobile phone tajunglen amshitsü asoshi tali angatettsü imlar, ta paisa ashi.



NAGALAND HEALTH PROTECTION SOCIETY

AB PM-JAY/CMHIS (GEN) aser CMHIS (EP) na tetsüingda kechi ?

PARTICULARS	PM-JAY/CMHIS General Category	CMHIS (EP) Category
Kibong shia Küm ka asoshi Insurance Cover	5 lakhs	Sen Rs. 20 lakhs. Government mapa nung alirtem küm tsüingda nung angutsü tim dak tali agir lira Medical Reimbursement (MR) agitetsü aser talila endokbatemji pei pei department-i meyipa agütsütsü. Ajisüaka, pensioner-tembo MR magitetsü.
Hospital Network	PM-JAY network/ shimteta aliba mozü kitem.	CMHIS shimteta aliba mozü kitem
Health Benefit Package Construct	Base: PM-JAY nung adenba teyaritem	Base: Central Government Health Scheme (CGHS) den kesa Health Benefit Package
Senotsü agütsüba :	PM-JAY atema agütsüba sen : Iba sentong atema agütsüba senji Center aser State na shilemji 90:10 asütsüla. Ajisüaka, tang Ministry ajanga kibong shia shilemji sen Rs. 1052 tashi dang shilem 90 agutsur, taji Centre aser State na shilem 90% aser 10 % melenba 51.45 % State Share aser 48.55 % Central Share asütsü. CMHIS (Gen) : 100% State Government-i agütsür. Govt mapa nung teinyakdak pur aser pensioner-tem 50% Medical Allowance jagi Insurance kümstüba ajanga agütsütsü.	Govt mapa nung teinyakdak pur aser pensioner-tem 50% Medical Allowance jagi Insurance kümstüba ajanga agütsütsü.
Takdang lezmütsüba	General Ward dang angutsü.	Pay level dak ajemdaker Private/semi-private mesüra general ward angutsü.
Temang shilem melenba (Implants)	Jenang telatet ka agüja lir ; Lateta yutsüba jenjang agi mamsemba jenjang tulu shimteta, shirangeri tetsüingda aitba senji agütsütsüla.	Jenang telatet ka agüja lir ; Lateta yutsüba jenjang agi mamsemba jenjang tulu shimteta, shirangeri tetsüingda aitba senji agütsütsüla.

TEMETETSÜ : Tekalen agüja aliba teinyakstütem ya AB PM-JAY/CMHIS (GEN) aser CMHIS (EP) categories dak metaloker alirtem asoshi lir. Teyari angutsü purtemi item sentongtem nung maliba teyari aser tajanzük aginüra, shimteta akaba mozü ki jagi sen talila meshitsü aser aji teyari angurtemi agütsütsüla.

Nütsüing cr. 140-i Bangladesh nung Hindu nung atema shisabulur: PM Modi

New Delhi, August 16 (Agencies): Brihostibarnü Ato kilonser Narendra Modi-i, India nung crore 140-i Bangladesh nung Hindu nungertem atema shisabulutsür, ta metetdaksü.

Tawa Bangladesh nung longkak aitertemi Sheikh Hasina-i aniba sorkar atsüingdokba sülen Bangladesh nung minority nütsüing teimtiba (Hindu) anema inyakba tatalokba aika lir.

Independence Day anogomong sentong nung jembidang Modi-i, "Kidanger linük ka ama Bangladesh nung tatalokbatem atema shisabulutsür. Yangji tekeraba

nung tensa tajungba akümstü ni imlar. Linük nung senso crore 140-i yangji aliba Hindu nung aser minorities kümzüka alitsü atema bilemstür. India-i asen kidanger linüktemji yimjung aser azükaru lenmang nung jasadaktsüner," ta metetdakja liasü.

Tamalen-a Modi-i Bangladesh nung interim sorkar lenir, Muhammad Yunus nem tenüingsang agütsüdang pa dang Bangladesh nung Hindu nung densema tanga minorities nübur ajak kümzüka alitsü atema inyakdaktsüner, ta mepishia liasü. Bangladesh nung sorkar atsüingdokba sülen district 48

kübok tesem 278 nung Hindu nung anema inyakba tatalokbatem liasü.

Tan hopta Yunus-i Bangladesh yimtiba, Dhaka nung aliba Dhakeshwari semdanga Hindu nung lenirtem den jembia liasü. Iba mapang nungji pai Hindu nungertem dang "Temedentemji ajak atema kasa lir. Asenok temeden kasa dang lir. Nüburtem tsüingda mebandangtsüla. Yimlibilema onok den yaritepang. Aremzüka liang aser tesülen ang onok tashimaitbatem asadangang. Onoki tamakok ngura iba sülen ang onok aijang," ta mepishia liasü.



August 16, 2024 nü Ato kilonser Narendra Modi-i 'Sadaiv Atal' memorial semdanga taoba mapang Ato kilonser, Atal Bihari Vajpayee asüba anogomong nung asür nem akhüm agütsüba noksa nung angur.

PM Modi-i Israel PM dang pua alirtem chioktsü aser rara anentsü mepishi

New Delhi, August 16 (Agencies): India nung 78 Independence Day amongba atema tenüingsang agütsütsü asoshi Israel Ato kilonser, Benjamin Netanyahu-i Ato kilonser Narendra Modi den jembiba mapang nung lenir anati West Asia tensa atema jembio.

Iba mapang nungji Modi-i Israel Ato kilonser dang pua

alirtem ajak chioktsü aser Israel-i Gaza anema raraba anentsü mepishia liasü. Ato kilonser Modi-i X ajanga, "PM @netanyahu-i phone ajanga jembiba aser India nung 78 Independence Day amongba salem lemsatepba atema pa dang pelar. Künati West Asia tensa atema jembio.

(Maneni tapak 8 nung...)

EC-i Haryana aser J&K nung assembly election agitsü sangdong

New Delhi, August 16 (Agencies): Hokolbarnü Election Commission (EC)-i Haryana aser Jammu & Kashmir na nung assembly election agitsü anogotem sangdongogo.

Independence Day anogomong nung Ato kilonser Narendra Modi-i "one nation, one election" atema jembiba sülen anogo ka dang lirbo EC-i assembly election agitsü anogotem sangdonger.

Modi-i "one nation, one election" atema jembiba aija

opposition-i, India nung election ajak khen nung dang agitsü atema jembir saka Election Commission-i khen nung state pezü nunga election magiteter, ta aitsü.

Congress lenir, Pawan Khara-i, "Yashi ang Ato kilonser Modi-i "one nation, one election" atema jembiba tang kechi ataloker? Parnoki state ana nung dang election ayonger. Parnoki khen nung state pezü nunga election magiteter," ta aitsü.

(Maneni tapak 8 nung...)

Kolkata nung BJP aser Police na tsüingda rara

Kolkata, August 16 (Agencies): Hokolbarnü Bharatiya Janata Party (BJP)-i Chief Minister Mamata Banerjee-i la menden nungi anentsüla, ta takhangba agüja longkak aitba mapang nung BJP züingsemtem aser police na tsüingda rara.

Tawa Kolkata nung aliba RG Kar Medical College & Hospital nung doctor tetsür ka tashiyim amshia raksatsüba sülen tepsetba tatalokba anema Hokolbarnü BJP nung inyakertem Trinamool Congress (TMC) sorkar anema longkak ait.

BJP-isa, TMC sorkar lenisüba kübok West Bengal ya Pakistan aser Afghanistan na dang nungia tamajungba kümogo, ta aitsü.

Shyambazar nung ayongzükba sentong nungji BJP MLA Agnimitra Paul aser Rudranil Ghosh na den BJP state Tir Sukanta Majumdar nung leniba nung party

züingsemtem aika liasü. Osang angazükba agi, Kolkata nung Shyambazar Five Point Crossing nung party-i longkak aitba sentong ayongzük, saka police-i nokdang aser BJP nung inyaker aika pua Lalbazar police headquarters-i anir ao.

Ano külen TMC -i, BJP-i yimteren nung tajanzük angutsü atema tensa raksatsütsü meranger, ta aitsü.

TMC lenir, Kunal Ghosh-i, BJP-i yimsüsüba state tem nunga item ama tatalokba nung ajemdaker Chief Minister temi pei menden nungi anen asü?, ta asüingdang.

"Item ama tatalokba alidang BJP-i yimsüsüba state tem nung Chief Minister temia pei menden nungi anen asü?. Telangzübaji 'masü'. Hospital raksatsürtemji kechi party nungi südir süka aputsüla. Iba tatalokba nung ajemdaker opposition-i tesempatsü politics asayar," ta paisa aitsü.



August 16, 2024 nü New Delhi nung Lok Sabha nung Opposition Lenir, Rahul Gandhi-i Foxconn Chairman, Young Liu ajurudang tangokba noksa nung angur.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUROI 17, 2024

Temzüng özüng kabo mesütettsü !

A tangji, linük nung küm talangka linük asoshi timtem maksü aika arema arur yimsü asür asünungji, Congress telok melena BJP telok yimsüsüba arur linük nung mapa tajung karbo inyakogo aser yamaji temelenshia lir, ajisüaka India ama alima tulu nung aliba kin kidong, oshioben aser tamangba yimsü ajak ayimbangtsüsa kasasa temzüng özüngbo meyanglutettsü, kechiyong tashi mangababo özüng agi merenshia melenshidaktsüsüa akok saka sobalibabo temzüng özüng agi kangashiabo memelenshidaktsütettsü. Ajisüaka, yakanü linük nüchiso anguba anogomung nung ato kilonser Narendra Modi-i jembiba o nung, pai kanga süoki ia jembiba onük anaji, ka, tamangba yimsü apia masü saka linük nung nübortem aoshi temzüng özüng ka dang alitsü tim ta jembiba aser kaji, linük nung parliamentary aser state assembly election na ya külemi alitsü nüngdakba indang kanga süoki ia nenshia metetdaksüba onüktem asütsü. Atangji, state shia nung assembly election khen alitsü, ano iba sülen parliamentary election alitsü aser ano town-tem nungbo tetsüngda nung Municipal aser Town Council election alitsü ta küm shia election alir amai aliba sentong yabo majung, kechiyong election yagi mapa aika nung akoksar, anungji akok nungbo ato kilonseri kanga süoki ia jembiba ama parliamentary aser state assembly election na yabo külemi agiang tajungba süla. Aji oda, linük nung parliamentary aser assembly election na mapang ka nung külemi alitsüsa inyakyim latettsüba yabo, temzüng özüng yanglur yimten yimsüsürtemi dang mulung nungbo, tasak masütsü. Ajisüaka, India nung senso ajak atema sobaliba temzüng özüng kasa dang latettsüba yabo tasak dang masü saka tamakoktsü aser latetyonga mapa küma mebenshitettsü. Aji oda, yashi iba yimobilem nung lemsatepba ama, kasa linük nung kasa sensosangertem asoshi temzüng özüng ka dang asütsübaji shitak amai jembir aser angar, saka kodang jungjunga bilemdangdir linük nung sensosanger ajak tamangba yimsü ka dak dang amanger mekümtet tashi linük temzüng özüng ajakbo sensosanger ajak asoshi kasasa mesütettsü. Tatsüba agi, kodaser Hindu, Muslim aser Khristan-tem kibakiyimba aser balaluba yimya aser inyakyim özüng kasa sütettsü ? Item takoktsü aser tamakoktsütem bilemdanga, koba government-i yimsü südir süaka, sensosanger ajak atema temzüng özüng ka asütsü memerangi, sensosanger ajak linük nung senso tajung kaka küma kati ka akümtsübutepa alitsüba shisatsü tajung enoktsütsü-ang bilema jembira, iba jagi India ya naro tapu aika topur junga aliba naro tsüki ka ama sünepsünepa, yimji yimjung nung nübortem pelatepa alitsü. Asenoki aiben asen taküm, kibong, lokti aser yimten akaba jenjang asadangdang, kimunglumung, kiojen aser senotsü akaba aser makaba indangang süksahir dang ashi, shitak asen taküm, kibong aser linük asoshi rongsen tulutibaji sensosanger telongjem aser teputep nung pelaa aliba tensa tia aser jenjang ya lir. Alima rongsen tapu aika liaka, nübortem pelaa melira, ajakji aut kumadoktsü. Tanü India nung yimten lenirtemi lokti nung jembiba o tem ya angadagra, nübortem pelaa lidaktsüsüba masü saka ain adokdaktsüsü aser kin kati kin ka anema apusodaktsüsü ayongzüker amai dang jembir. Item o jagi meyiper peisasa peia lendong ajurutsü. Item o temji kin yangerba o masü saka kin tashimait kümdaktsüsüba shisa makaba o tem lir. Iba amaji jembiba jembia tawa Bangladesh nung atalokba ama nübortem shitakba ain adokra, ka ka ta mali, ajak akoksatsü. Yimsüsüba menden aser mapang yabo shinga telok asoshia teti atema masü, kari kenü, kari kenü ta melentepa yimsü asütsü. Iba mapang nungji tesüiba putu nung yimsüsürtemi takok aser tamakok angubatam bilemdanga tanü yimsüsürtemia tanü ajung asaa masü saka tarutsü indang bilema jembira aser inyakra, ashiko, linük nung election tongti ana külemi agitsübajia melamelaa lemtettettsüa akok. Aji oda, tang aliba India ya meraksai India küm noklangjung mung mungnüra, ajak atema temzüng özüng ka masü, ajak India asoshi temulung ka dang akümtsübajiang tongtibangba asütsü.

OLEMSABANG

Toklang tenzükeri sen ketdangsüba

P. Renthly Jamir

(Yashi adok nungi...)

Iba sülen 1957 küm sen tejenba koba nung senpak ka nung poisa 64 liasü iba to sen tasenba Naya poisa tasür senpak nung poisa 100/- agi melena yanglu. Iba den külemi Naga nung nujiso bushitsü tenzükeri anungji India Governmenti nübur mesüzüka L.P Schooltem nung tesayur direct direct teinyaknür ajak shima ita sen 60 agüja Government mapa balala nung anioka ita sen agir kar kar aliba ajanga Ao lima nung sen tera tera amshi. Saka ano külen Arem nung alirtemi shibai ita sen agia Government mapa inyakdir ta aika lepseta entok aser sarubo anepdanga aonunga linük saru tentet Raja Peyu Saru, tzükong President saru yimdak Rana peyu saru Volunteer saru women tsür saru Impur saru Army saru Pangtong saru ta sen dang masü jang seret ta cup tashi saru. Aji dang masü ajungbena ajungbena tang Naga army nisung 30 , 20,10 pungo tashi atema sorujokjang ta ita nung Ak anana asemsemsa apu. Onok yimer küm kabo sen O jang saruba medeni kibongshi yim nung Ak anana asemsemsa apu. Onok yimer küm kabo sen O jang saruba medeni kibongshi yim saru tsük yimchi 7 ata (kijung) amitsür yimchi 4 ata aji oda aayangertemi sen terara aah-ar arubaji linük saru nung oma. Saka aahyangertemi sen terara bener aruba jagisa yimdak arogo nung tenla terara arua arogotem nung sen terara amshi. Ao lima arogotem nung tsükbo lir saka sen maka asü .Anungji tangar arogotem nung koma memetet saka onok yimdakbo mapangsür külem inyaker rongnung kar tsük mapangsür kar sen mapangsür ta jateta liasü.

Onok tanur asüdang India sen tejenba amshidang tongtibangsa Borten dang (Khristmas) ajak tenla abener anungji poisa rangbenbo kakati dang aben saka pai kaka teimbasa aben. Iba pai ya asem agi poisa ka akümer. Yamaji arogotem nung sen terara inloka aonung onok yimera 1957 nung arogo sen ayutsü safe ka Jorhat nung alia Amguri tashi Gari nung bener alur Amguri nungi yim tashi tebur tashikar nisung pezü pezü melentepa melentepa apur atuba bilemteter.

Kechiyong alima tensa majungba agi auür onsara bulua aküm yamaji Ao arogotem nung tanem tanemi joko sen ayutsü safe alia tenzükeri. Aser arogo nung pastortem nem ita sen teimba agütsü tenla ki tajungba asü. Alima ainba ama arogotem senbonga ain. Ano Nagaland State ngur Aor MLA 10 aküm parnok rongnung Cabinet ka Minister of State ka Deputy Minister ka ta liasü. MLA ita sen 500 Deputy Minister 700 State aser Cabinet Minister 1000 ta liasü. State nung sen bulua amshi aser Nagaland rangben nung mezüngbuba millionaire ta sür Aor Tsükjemwati O tebu Marsosang na tenüng agütsü. Sen cash-bo Million ka majung saka takaba ali kio-jen rongsen ajak benteper Millionaire tenüng agütsü ta ashi. Aor sen aka ta asüyonga ano sen talubo maka sen dang sen ja-a liasü. Kechiyong India sen ya 1947 nungbo America sen dollar ka nung Rs.2.50/- dang liasü tanübo dollar ka nung Rs.84.00 lir. Yamaji sen tapuba akümer India nüchiso ngur ita sen teimba President nem Rs10000 agütsü. Saka ita sen agir sen tupet tuja joko President ita senjibo yutsür R.B.I Governor Ujit Patal ita sena 1-4-2016 nung Rs370000 agütsü. Tang graduate teacher ajak ya ita sen lakh tema angur. Aser Ao arogotem nung kechiba sen amshir mamshimar ta süra Nagaland Governmenti State sen aruba 65% ita sen nung entoker tanüngba 35% dang terenlok mapa nung entoker. Aser arogotemi tokolok amshia ita shi ter shilem list adoktsür, anungji ita sen agirbo list nungji melira medemer yimer dang aaker joko tabentsüsa akümer tokanpur contractortembo list nungji maliyonga kecha maikoi mali. Anungji ita sen agir pensionertemi arogo senji tali züina kümdaktsür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Iran nung Muslim nung million 1 dak temai Khrista agizükogo

August 16, 2024: Tang Middle East nung rara tuluba akümtsüsa aliba tensa ka nung 'Jesus Revolution'-a atalokdar; talisa Iran nung Muslim nung million 1 dak temai Khrista agizükba ajanga mosque aika shibangdar, ta osang ka ajanga metetdaksü.

Iran nung nisungtemi taküm jenjang tajungba bushia Muslim nung aikati Yisu Khrista sülen anidaksü atema telemtetba agir.

Iran nungertemi Ayatollahs agi laktetogo aser Islamic tangatetba nung ajemdaker yazü tenangzükbatem agi laktetogo.

Tangbo Iran nung nütsüng shilem 80-ibo democratic sorkar aginer, ta survey ka ajanga bushitetogo.

Melungtet telok The Voice of the Martyrs (VOM) nungi Todd Nettleton-i, "Iba linük ya alima nung temesepba mozü achir jenti aliba linüktem rongnung densema lir. Ochimashi tulu aliba linüktem rongnung densema lir aser kanga sensak tia nung alir nütsüng aika aliba linüktem rongnung densema lir," ta metetdaksü.

"Iran nung nübur aikati, 'tesüiba küm 45 tsüngda Islam yimsü ajanga yamai bener arutsü-a ma? Onoki mepelar' ta jembir. Onoki tanga lenmangtem-a metetner ta parnoki ashir," ta Todd Nettleton-isa metetdaksü.

VOM nung Messaging tatong Tir Nettleton-i, Iran nung Muslim nung million 1 dak temai Islam yimsü toktsür Yisu shimogo, ta metetdaksü.

Iran nung mosques 75,000 shi lir aser iba nungjagi mosque 50,000 shibo shibangogo.

Nettleton-i, "Iba ya ajanga yimsüsürtem mepelar aser parnoki sorkar anema ola adokertem anema inyaksü asoshi lenmang bushir. Taküm küm ya 'year of Bible study' lir. Parnoki house churches mita aoer aser nisung ajak noksa tangoka asüngdangyar. Ano lenirtembo apur aser jail nung puoker," ta metetdaksü.

Nettleton-i ashiba agi, Muslim nungertemi Islam yimsü toktsüba atema kinüngertem dang nungibo sorkar ketdangsertem tejashiba, ta ashi.

Tide Ministry nung executive director, Don Shenk-i, Muslim nungertemi pungmang-mangdang nung Yisu Khrista ajuruba sülen taküm nung tetezü bushir aser Tsüngrem taliba angatettsü meranger, ta metetdaksü.

"Iran nung dang masü saka Islam lima tesem ajaklen nüburtem tangatetba tasen ka

dangi aruba ajangshidar," ta paisa metetdaksü.

Shenk-i ashiba agi, Tide Ministry radio broadcasts ajanga Afghanistan-a ayimjemdar. Iba linük nung Taliban teloki Khristan yimsü jangrartem anema inyaker.

"Afghanistan nung melung malem tulu lir. Ni iba linük nungji nüburtem ajurua parnok kari 'ni Yisu dak amanger ka' ta kü dang ashi nunga ibaji shidakba ashir asü kü maitsü jangjatsü atema jembirar memetettsü," ta pai metetdaksü.

"Item ama linüktem nungbo Khrista agizükba alima nung pei taküm tembangtsü-a melunga Khrista agizükba lir," ta pai ashi.

Yemen nunga Khrista osangtajung kanga prokdar. Iba linük nung Khristan nütsüng anasü agi teimba kümogo, ta Joshua Project indang report ajanga metetdaksü.

Saudi Arabia nunga sorkari Khristantem aser Arogotem terabo agizükteddar, ta Nettleton-i ashi.

"Saudi Arabia nung Khristantemji azüita agizüker masü saka iba linük nung

Khristantem terabo agizükteddar," ta pai ashi.

Tsüngrem tanelai mapa inyakba ajanga Iran nung dang masü saka Middle East tesem ajaklen Muslim nung aikati Khrista agizüker.

Talisa Khristan yimsü agizüker tasenpurtemi medemer aser kibong züngsemtem den yimsü tasen lemsatepba ajanga-a Khristan nütsüng renloker. Iran tesem ajaklen House churches amenoker aser ibaji ajanga tamangertem pei tamang jenjang nungi matsüngshir.

House churches, online media gospel programs aser nisungtem tsüngda Khrista osangtajung lemsatepba ajanga linük tesem ajaklen Khristan nütsüng renloker.

Reshikangshi ajanga Iran nung Khristan yimsü samatsüsa liasü ajisüaka mamangteti Arogo ang kanga keraa ainer.

Tanü-a Iran nung Khristantem ayongzükba jenti ajangshir. Arogo kanga ainer, anungji tamanger tasenpurtem nungtsüsütsü atema kanga nungdaka kümogo, ta ICC-i metetdaksü.

ANO GO ABEN TSÜNGREM DEN

Khrista Asenok Pükümer

"Tebusangtem, nenok temenen

mebenshidaksütsü atema ni item o nenok dangi zülü" Aser nisung kari temenen menara, Tebu den asen Teyariba temeshi Yisu Khrista lir (1 Yn 2: 1)

Pükümerji ozüng beshiner nem agütsüba tenüng ka lir, saka ali nisung nem agütsüba tenüng ama Yisu Khrista nem agütsüba obendanger tenüngji mangatettsüla. Paji tamang katetba ochi aser tejak mereprangba obendanger dang masü, saka paji temeshiba obendanger chir lir. Pa tsüngdang asenok ajak nokdaksü. Asenok temenen taidok angutsü asoshi pa asü.

Asen menen nangzüktsü asoshi iba obendangeri ata alir. Shimoki Khrista tekümtet mapa nung amanger pamok obendangba matsüngdang temeten angutsü. Obendangsangji asen Tebu, aser pai Khrista temeshiba nung ajemdaker asenok metentsütsü. Temenen temerenshi tasüba nungi nüji küm daksü. Kodang kü nem taidok agütsü ni nüji aküm.

Ni temenen nungi chioker külen temeneni ni anema arutsü asü ? Ni ano taittsüba kübok alitsü asü ? Ni ano obendanger matsüngdangi orr noktaksü asü? "Ajak agütsüogo," ta kü o bendangeri ashitsü. "Ni ajak agütsüogo," ta Khristai ashi. Taittsüba mali. Shingaia aitsütsü makok. Atangji taittsüba ajak nungi nüji kümogo.

Oba, ne chir kü o bendanger küm daksüba asoshi Ne tenüng asanger.

Russia aser RoU nung Khristantem kanga reshikangshir: RI



Russia sepaitemi Ukraine nung raksatsüba Tenla kitem noksa nung angur.

August 16, 2024: Russia aser Russian-occupied Ukraine na nung Khristantem ano tamajungba reshikangshidar, ta melungtet telok Release International (RI)-i metetdaksü.

Release International-isa, tang Russia aser Russia-i atsünga aliba Ukraine na nung Khristantem anema inyakbaji Soviet Union mapang nung amai lir; Khristantem tepuokdak ayur, reshikangshir aser tepseter, ta metetdaksü.

Khristan sayutsüngir, Eduard Charov-i Russia-i

Ukraine amakba anema ola adokba agi tang pa Russia nung pua lir aser pa anema ken o angadangsü.

2023 küm Eduard-i social media post ka ajanga, "Yisu Khristai Ukraine nung nisung tepsettsü atema aotsü asü?," ta asüngdanga liasü.

Russia-i atsünga aliba Ukraine nung Khristan lenir katia rara anema ola adokba agi pua lir, ta Release International-i metetdaksü.

Protestant Khristan, Olena-a Russia nungeri atsünga aliba Melitopol nung

anogotem amai lir," ta pai metetdaksü.

Khristan Charov aser pa kinüngtsü nati ki malirtem jenokdaksütsü atema shelter home ka lapoka lir. Tan ita pa anema ken o angadangsü aser tepuokdak ayutsüa akok.

Russia nung osangbener den jembidang Charov-i, "Kidang ni kü suitcase renemogo. Ni malidang kü kinüngtsüi shelter home repranga atatsü. Ni maneni jail nung tangartem yaritsü, kechiyong tesem ajaklen teyari nungdabapurtem lir," ta ashi.

Tawa United States Commission on International Religious Freedom (USCIRF) report ajanga-a Russia-i Khristantem anema inyakba osang sangdonga liasü.

"Russian-occupied territories [of Ukraine] nung ketdangsertemi tamangba yimsü telok balala nokdangogo, tekülem kitem mita aoer aser yimsü lenirtem apur mesüra samar," ta USCIRF report ajanga metetdaksü.

"Zaporizhzhia region nung Russia ketdangsertemi Ukrainian Greek Catholic Church nokdang aser Orthodox Church of Ukraine, Roman Catholic aser Baptist Arogotem shibangdaksüogo. Taküm küm tatembanglen tashi nunga Russia nung sepaitemi pua aliba putirtem kong aliar mejangjatsü," ta USCIRF report ajangasa metetdaksü.

Release International CEO, Paul Robinson-i, item ama tatalokba ajanga Russia aser Russian-occupied Ukraine nung Khristantem ano tali reshikangshiba kuli sayur, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Talongtsü

- (n) longa-longa senzüba gari (wheelers)
- * Tanü asüngbo talongtsü tapu aika adoka lir.

Talubo

- (adv) agir magima, jenti (abundant)
- * Tangbo asen lima nung züingi talubo angur.

OLONG PAITEP # 6897

1		2			3				4
		5						6	
7									
8					9				
10		11			12				
					14				
15									
16								17	

TIPLÉN	LANGTSÜNGLEN :
1. Kecha tepila mali - 4	2. Süng teküp saktok - 5
3. Alu junga maru - 6	3. Yangkhu nung enok - 4
5. Tesasa - 9	4. Mongpu ka - 8
8. Paitep - 5	6. Aonung tesangwa - 3
9. Temulung alem - 5	7. Mapa meinyaknü - 8
10. Tartsü - 5	11. Teret meyipangba - 3
12. Talaktsüka asateper - 5	14. Tsük satet - 4
15. Kaketshir - 9	
16. Sünga asepe - 6	
17. Sentsü anü - 4	

OLONG PAITEP # 6896 TELANGZÜBA

TIPLÉN :	LANGTSÜNGLEN :
1. Tanga, 6. Wara, 7. Rajang,	2. Anga, 3. Yabang, 4. Tarok,
9. Anük, 10. Jenjang, 11. Alar,	5. Orak, 8. Ainer, 9. Anema,
14. Ngashi, 15. Nala, 16. Mechi.	10. Jabili, 11. Among, 12. Miim,
	13. Anem.

NAI-A YA METETTER MA



Nigeria nunger Munachimso Brian Nwana-i ghonda 24 nung fast food restaurants teimtiba semdangba alima otsü yanglutetogo. Arishi küm 22 tain Brian ya content creator aser food consultant ka lir aser pai Nigeria yimtiba Abuja nung iba otsü yanglu. Tesüiba nung fast food restaurants 100 semdangba otsü ka yangluteta liasü saka Brian-i kasa mapang fast food establishments 150 semdang ta Guinness World Records (GWR)-i ashi. Iba mapang private transport kecha mamshitsüla aser Brian-i iba otsü tasen yanglutsü atema tetsüing agi kilometer 25 tashi jaja.

Assam Police-i tanabuba Annual BMI Testing tenzükogo



Guwahati, August 16, 2024 (Agencies): Assam Police-i Body Mass Index (BMI) testing tanabuba tenzükogo aser iba ya police physical fitness tajungba akümtsü nükjidong nung agir. Director General of Police (DGP) Gyanendra Pratap Singh ketdangsüba kübok iba mapa inyaker aser yaküm Assam Police nung teyirar 1.6% aliba nungi taküm tajemba asütsü teimla lir. Taküm assessment process nung weight measurement nung temulung agütsür. August 16, 2022 nungi iba mapa tenzükogo ta DGP Singh-i ashi. Chief Minister Himanta Biswa Sarma-ia mapa pusema nungiter aser kanga jizükertem mesüra temang nung tanga timtem alirtem mapa nungi anentsütsü shiogo.

Tirap kübok Malu Gaon nung nakmati bendenba magizüker

Itanagar, August 16, 2024 (Agencies): Ledo nung otsüsütsü aketba tesem Malu Gaon nung ozüing alema shibelenba nakmati bendenba magizüker ta Tirap Autonomous District Council Demand Committee-i metetdaksüogo. "Malu Gaon ya North East Frontier Agency (NEFA) nung tongtipang yimtsüing ka lir" ta TADC general secretary & spokesperson Pallab Shyam Wailung-i ashi. BJP-i aniba sorkar aser Union Coal Minister ajanga Malu Gaon nung lisopurtem anogo 15 tsüingda yimtsüing toktsür aotsü tetuyuba agütsüba magizüker ta pai ashi. 1952 küm Assistant Political Officer kati Tirap division ya lisopurtem alidak anungji tangartem iba tesem nung teti atema melitetsü ta sangdonga liasü. Ajisüaka bendanger aika Tirap tribal belt nung arua alir, ta Wailung-i ashi. North Eastern Coalfields Coal India Limited Margherita-i Malu Gaon aser iba temeket aliba tesemtem nung aliba lisopurtem dang nungi temelaba magii tetuyuba agütsüogo. Anungji TADC-i anir tanga lisopur teloktemi iba sangdong meyipa magien tashi lungkak aittsü, ta pai metetdaksü. "NEC CIL Margherita, Margherita sub-divisional administration (civil), Tinsukia district Deputy commissioner aser Assam sorkari sangdong meyipa agitsüla mesüra Tirap Autonomous District Council Demand Committee, All Assam Tangsa Student Union, All Assam Sema Naga Council, Pan Singpho Student Union, All Assam Mech Kachari Student Union aser tanga Tribal Indigenous organization ajanga lungkak aittsü" ta Wailung-isa ashi.

Jorhat child observation home nung tanur 13 dak HIV putet

Guwahati, August 16, 2024 (Agencies): Assam kübok Jorhat nung aliba child observation home ka nung tanur 13 HIV positive putetogo. Iba child observation home nung tanur 77 alir aser HIV positive tanur 13 atema medical support aser treatment tenzükogo. Iba ajanga Jorhat district kübok tesem kar nung HIV kanga menatepba atema tebilemtsü tulu ka ajuruogo. "Observation homes nung tanur teimbaka drug addicts lir aser parnok aikati ozüing alema mapa inyaker. Iba atema tebilemtsü abener" ta Jorhat Additional District Commissioner Pankaj Borah-i ashi. Assam State AIDS Control Society (ASACS)-i Assam nung HIV/AIDS noktangtsü atema mapa balala inyaka arur. National AIDS Control Organization (NACO) indang maparen balala parnoki inyaker. Assam nung Integrated Counseling and Testing Centres (ICTC) 107 lapoka lir.

Bongaigaon nung sorkar ketdangsür 2 süpokrem agidang apu

Guwahati, August 16, 2024 (Agencies): Assam nung Anti-Corruption ajanga sorkar ketdangsür anati süpokrem meshia agiba atema apu. Srijangram Development Block, Bongaigaon district BDO Nekib Ahmed aser APRDS, BDO Khurseeda Khanam nati Assistant BDO ajanga süpokrem meshia agiba atema apu. August 6 nü Anti-Corruption ketdangsürtemi Kalaigaon Revenue Circle Office nung Lat Mandal Rahiram Mondal apu. Pa den külemi pa driver Dhruv Nath nati süpokrem meshia agidang apu. Rahiram Mondal-i Rs 10,000 meshia agidang Anti-Corruption ketdangsürtemi apu ta osang angazüker. Nisung kati land title ka angutsü atema süpokrem agütsü aser ibaji Rahiram Mondal tenüing nung Dhruv Nath-i meshi. Directorate of Vigilance and Anti-Corruption, Assam-isa July 18, 2024 nü Cachar, Silchar nung Patwari Nurul Hoque Barbhuiy-i süpokrem meshia agidang apu.



West Bengal kübok RG Kar Medical College nung postgraduate student ka dak tashiyim inyaker tepsetba anema Manipur Youth Congress-i Imphal nung lungkak aitba sentong ka agiba angu. Iba candlelight vigil ya tasür pusemba aser iba tatalokba aitsüba nungtem nung ayongzüka agi aser shilem agirtemi temeten meshiba den medical professionals kümzüka ayutsü atkhangba agütsüogo.

Pakistan nung mpox virus nisung asem dak putetogo

Islamabad, Luroi/August 16 (Agencies): Pakistan nung nisung asem dak mpox virus putetogo, ta northern Khyber Pakhtunkhwa province nung aliba health department ajanga Hokulbarnü ashi.

Iba tashidak wara ya United Arab Emirates nungi aruba shirangertem dak putet ta department-i ashi. World Health Organization ajanga tawa temi jateta adokba tashidak nungya virus tasen ka jangjatetba sülen 'public health emergency of international concern' ta sangdonga lir.

Taoba mapanga Pakistan nung mpox ta ajaba monkeypox tashidak ya liasü. Aser tang shiranger dak puteta aliba ya koba variant'ar mejangja.

Shiranger ana dak mpox aliba jangjaogo, ta Khyber Pakhtunkhwa nung director general of health services, Salim Khan-i ashi.

Shiranger tasembuba

indang samples ya jangjatsü atema linük yimtiba Islamabad nung aliba National Health Institute dangi yokogo aser par asemprong quarantine süa lir, ta pai ashi.

Pakistan national health ministry odongtar kati Pakistan nung mpox südi ta temulung melemtetba case ka puteta lir ta shia liasü.

Sweden nunga mpox virus tasen shiranger ka dak putetba Brehostibarnü alima nung health ketdangsür temi sangdonga liasü aser ibai Africa nung tali jatetba nung sendaktepa lir. World Health Organization ajanga iba tashidak ya global public health emergency ta sangdonger anogo ka lir Africa continent alema oa prokshiba case mezüngbubaji Sweden nungya liasü.

Democratic Republic of Congo nungi anasa aliba linüktem nung mpox cases

prokshia aoba ajanga Bodhbarnü WHO-i Africa nung iba tashidak poktetba ya 'public health emergency of international concern' ta sangdonga liasü, koba saksalemstü jenjang tematiba alitsü.

Congo nung iba tashidak ya January 2023 nung poktetba sülen tanurtem timba sür nisung 1,100 dak tema süogo aser cases 27,000 shi lir.

Monkeypox virus ajanga adokdaksüba tashidak yagi temang nung ara amai adoker, terjang amai adoker aser temang metar aser nisung karbo kanga shirangdaksür, ta WHO website ajanga ashir.

Mpox virus ya iba tashidak keta alir dak kongshiba (shi nung medemba, tepang mesepba, aziütba mesüra teka amtepba) ajanga menateper, mpox keta aliri amshiba süoshi nung kongshiba, aketba aser hajiba nungia menateper.

Thailand ato kilonser inyaksü Paetongtarn Shinawatra shimogo



Paetongtarn Shinawatra

Bangkok, Luroi/August 16 (Agencies): Hokulbarnü Thailand indang Parliament-i linük ato kilonser inyaksü atema taoba lenir Thaksin Shinawatra'er jala tanutsüla Paetongtarn Shinawatra shimogo.

Arishi küm 37 tain Paetongtarn ya Shinawatra'er kibong nungi Thailand ato kilonser tasembuba alitsü. Paetongtarn tebu Thaksin Shinawatra ya mitkar temi tashiyim amshia yimsüsüba menden nungi atsüngdoker bendang lima nung jenoka aliba taoba küm meyipa shilang aser ta tenü Yingluck Shinawatra ya ato kilonser inyaka lir tang bendang lima nung jenoka lir. Paetongtarn ya ruling Pheu Thai party lenir lir, saka elected lawmaker masü.

Anogo ana tejakdang yimya kar nung aibelenba mechi Constitutional Court ajanga Thailand ato kilonser tesüsaba Srettha Thavisin ya mapa nungi anenja liasü.

Paetongtarn-i Parliament nung vote timba angu aser iba osang züluba mapang tashi voting agia liasü.

Ato kilonser inyaksü atema nominee Paetongtarn Shinawatra kisüng liasü. La ya election ajanga shimba masü, aser ato kilonser inyaksü atema aji menüngdaker.

Paetongtarn ya Parliament indang vote ajanga agizükra, la ya Thailand ato kilonser inyaker tetsür tanabuba alitsü aser la ya

linük nung ato kilonser tanutsüla asütsü.

Parliament nung vote ajak ngutetba Thai nung yimten yimsüsür mezüngbuba ya Thaksin liasü. Pa ya Thailand nung nüngtugutiba saka nüburtem tsüngta tsükchitep adokdaksür lenir ka liasü aser 2006 küm mitkar temi tashiyim amshia atsüngdok. Pa ya aikati tang tashi Pheu Thai indang lenir ama züngshir. Pa kanga nüngtugu asüba yong Paetongtarn yarir tali akum.

Paetongtarn-i Pheu Thai atema nübuyimba mapang lai kinunger tesendaktep lir ta ashi saka la tebu melen masü ta shia liasü.

"Ni kübu indang tanüla masü. Ni teti kübuer jala alitsü, saka kü sasa telemtetba agir," ta osangbener dang ashi.

Küm ka majung ato kilonser inyaka arur Srettha Thavisin ya Bodhbarnü Constitutional Court ajanga anenja liasü. Sübokrem amshitsü merangba nung tai tonglokja alir ka Cabinet züngsem ama shimba nung Thavisin-i aibelenba aliba ngutet.

Thai yimten anokshitsü asoshi hopta ka tsüngtai ibai tongtipang obendang tanabuba liasü. Taoba hopta kasa court yagi Move Forward Party shibangsü, shirnoki taoba küm general election nung takok angu saka sorkar mekumtetdaksü. Iba party ya tang People's Party ta nüngja agütsür asendenshia lir.

2001 küm nungi Pheu Thai yagi national elections ajak nung takok ngua aru, shirnoki Thailand rongsenketzüng tebilemstü bentetsü aser rongsen aruba tsütsü apular ama inyaksü nangzük, saka 2023 küm Move Forward Party-i tsükdaksü. Ajisüaka mitkar temi shimba Senate-i Move Forward nem sorkar mekumtettsü tenokdangba agütsüba sülen Pheu Thai maongka angu.

Move Forward ya Pheu Thai indang coalition nung medendaksü aser parnok ya military government den sendaktepa aliba party tem den teka amtepba yong züngsem kari aija liasü.

Thaksin ya küm aika bendang lima nung jenoka lir taoba küm Thailand-i meyipa shilanga liasü.

Military government kübok 2017 küm constitution yangluba nung ato kilonser inyaksü candidate tem nokdangsü taoba Senate nem tashi balaka agütsü. Ajisüaka May ita parnok kümsük atemba mapang iba tashi ya tembang aser taoba ita shimba Senate tasenba nung iba tashiji mali.

Candidate kati tangbo lower house nung majority mesüra votes 247 nüngdaker. Pheu Thai-i anir tang party 11 coalition nungya lower house nung züngsem 314 lir aser parnok ajaki Paetongtarn ya mulungsoa shim.

Move Forward party anentsür iba telok nungi ato kilonser inyaksü jangra aliba candidate Pita Limjaroenrat ya yimten yimsüsüba nung shilem magitsü tenokdangba agütsü, anungji Pheu Thai-i aniba coalition den ato kilonser asoshi tokteptsüpur tejangja mali aser party 11 agi akumba coalition nunga tangbo ato kilonser inyaksü nübu mali.

SANGDONGER

Mangmetong yimdak August 14, 2024 nü Naga Independence Day anogomung nung adener Longkhum, Mangmetong, Alichen aser Satsu yimtsüngtem nungi onok ex-national workers temi aser iba sentong nung adener temi Government of India (GoI) aser Nationalist Socialist Council Of Nagalim (NSCN) tsüngta August 3, 2015 nü zülutepba Framework Agreement bhukuma nokdaker ta sangdonger.

Village	Name	Signature
1. Longkhum	Wokrenchung	[Signature]
2. Mangmetong	Jangya Javit	[Signature]
3. Alichen	Jasii Jangtang	[Signature]
4. Satsu	Langri Buchi	[Signature]

GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA

CIRCULAR

Kohima, dated the th August 2024

NO. ED/NFTW-CT/1/2022:: All the District Education Officers, Sr. Sub-Divisional Education Officers and Sub-Divisional Education Officers are hereby informed to collect the Teachers' Day Token Flags as per the number of Teachers & Students (both Government & Private) under your respective establishments from 19th August to 27th August, 2024 from the Directorate of School Education, Kohima (Room No-512) without fail and all the Head of institutions both Government and Private Schools may collect the Teachers Day Token Flags from their respective DEO, Sr. SDEOs and SDEOs.

(THAVASEELAN K) IAS
Principal Director

Gaza ceasefire deal renemstü atema inyaksü: US, Qatar & Egypt

Doha, Luroi/August 16 (Agencies): United States, Qatar aser Egypt külemi sangdong ka agütsüba nung tetsüngtai ia ken o jembirtemi Gaza nung rara tembanga Israel nung pua alirtem chiochtsü asoshi tekeraba nung mapa kuma inyaksü atema "bridging proposal" ka agütsüogo, ta shi.

Hokulbarnü linük asem yagi Doha nung ceasefire ken o süoki ia aser tangatetep leni arua jembir, ta ashi.

Israel-i Beirut nung Hezbollah commander ka tepsetba aser Tehran nung Hamas indang political chief Ismail Haniyeh tepsetba ajanga region nung rara tuluba akumstü ta tsübotepa aliba mapang tang jembishinü ya Brehostibarnü tenzüka liasü.

Hokulbarnü sangdong ya taoba mapang mediators temi jembiba den sako lir aser taoba mapanga ceasefire alitsü aser pua alirtem chiochtsü mapa inyaksü menuba magizüker, ta shia liasü.

"Takum kumzüksü, Gaza nung aliba nüburtem nem teyari bener arutsütsü aser region nung tensa tajungba akumstü atema lenmang renemogo," ta linük asem yagi Hokulbarnü ashi.

Iba sangdong nungya proposal tesüsaba indang tejangja mashi saka May ita US Tir Joe Biden-i benokba deal nung ajemdaker yanglu ta ashi.

US-i yangluba sentong yagi rara atemstü atema lenla balala nungi inyaksü, aser iba mapang hopta trok rara anena

atatsü aser iba mapang Gaza nung pua aliba Israel nung kar aser Israeli jail nung puoka aliba Palestine nung chiochtsü.

Phase tanabuba nung teti atema rara atemstü aser tanüngba Israel nung ajak chiochtsü. Iba agreement tatenbangba nung Gaza Strip yanglushitsü densema lir, koba Israel-i kanga mejungi raksatsüogo.

"Agreement mapa kuma inyaksü atema anepalutsü, nübur nem teyari agütsütsü aser pua alirtem atema tejangja sentong yanglutsü densema teinyaker temi maneni technical mapa inyaksü," ta sangdong ajanga ashi.

Hamas-i teti atema ceasefire, Gaza nungi Israel sepai ajunga anizüker aotsü aser tepuokdak alirtem süoki ia melenteptsü indang tezüngzüktep dang agizüksü ta ashir.

Israel-i tang tashi iba rara atemstü atema mangdang tejangja agüja mali. Israel ketdangsür kari iba ceasefire ya mulunga agizüker ta ashir, saka Ato Kilonser Benjamin Netanyahu-ibo par linüki "total victory" mangu tashi raratsü ta shijen ashir.

White House odongtar John Kirby-i Doha nung jembishinü teimla kaa tenzükogo, ta Bodhbarnü shia liasü. "Ibai tongtipang mapa lir. Tanüngba tetsükdaksü ya ajangtettsü aser asenoki iba inyakyim tembangtsüla," ta pai osangbener dang ashi.

KDFA-i Roko Angami nem tenüngsang agütsü



Kohima, Luroi/August 16 (TYO): Kohima District Football Association (KDFA) ajanga par senior vice president Roko Angami nem tenüngsang agütsüba sentong ka Hokulbarnü ayongzüka agi, shiba Department of Youth Resources & Sports, Nagaland kübok Officer on Special Duty (Sports) ama shima liasü.

Iba sentong nung Roko Angami-i jembidang, Nagaland tesem ajungalen saisapong tsütsü aser talisa football nung temelenshi tulu bener arutsü atema ajaki yariteptsü ayongzüka liasü.

State nung football dak tali rangloker saisapong jenjang temabai ajungkettsü asoshi akok tashi tajungtiba nung inyaksü teimla nung bendanga agütsür saisaponger ajangzüksü atema inyaksü, ta pai ashi.

Iba maongka amshia Chief Minister Neiphu Rio-i pa nem OSD (Sports) mapa nungloktsüba atema pelaba

lemsatepa liasü.

State nung saisapong balala aser talisa football tajungba kumdaktsütsü CM mangdang asangsang akumtsü atema bendanga agütsür inyaksü, ta pai ashi.

Pai KDFA tir aser külem tenzüker dang iba konang asoshi pelaba lemsatep aser state tesem ajungalen saisapong tajungba kuma ajungkettsü asoshi külemi inyaksü ayongzüka liasü.

Nagaland Football Association tir K. Neibou Sekhose-i Roko nem mapa tasenba asoshi tenüngsang agütsüba mapang, "Nai temulungtetba tulu nung meranga inyakba ajanga nai iba jenjang tongtetogo," ta ashi.

Ibai NFA aser football asayartem atema tepelatsü osang ka lir, ta Sekhose-i ashi aser state sorkar dang pelaba lemsatepa liasü.

Roko Angami ya NFA indang Director of Coach lir.

KDFA tir M. Mathew

Yhome-i OSD (Sports) tasenba Roko Angami dang state nung sports policy tajung bener arutsü asoshi state sorkar den inyakteptsü ayongzük aser iba ya ajanga lanurtem aser saisapong nung sempet alirtem ajungmesotsü, ta ashi.

Eastern Nagaland nung saisapong atema ki o jen aser facility agi kanga anünga lir, anungji state nung telemsa makai saisapong ajungkettsü ayongzüker, ta Yhome-i ashi.

State nung saisapong aser talisa football renloksü atema Roko dak tamang akaba atema pai CM Rio-i anir state sorkar dang pelaba lemsatepa liasü.

Iba sentong nung Football License Coaches of Kohima District aser Kohima District Football Referees Association ajanga Roko Angami nem tetushi agüja liasü.

Iba sentong nung KDFA press secretary Medolenuo Loucü menden liasü aser KDFA executive member Pudil Tsükri-i sarasadema sentong tenzüker.

Kohima nung 4th Inter Department Badminton Tournament tenzüker



Kohima, Luroi/August 16 (TYO): Inter Department Badminton Club (IDBC) Kohima ajanga ayongzükba 4th Inter Department Badminton Tournament Kohima asayamung Hokulbarnü Nagaland Legislative Assembly Stadium, Kohima nung tenzüker.

Iba asayamung nung department 25 shi nungi age category balala nung tetsür aser tebur asayar 84-i shilem agitar, koba Honibarnü tembangtsü.

Iba asayamung tenzükerba sentong moaja jembidang, iba asayamung ya ajanga ketdangsür temi department

balala nung mapa inyaker lanurtem dak sempet jangiateta tematiba jenjang nung state tenüng nung tokteptsü asoshi anitetsü imlar, ta MLA aser Chairman, DPDB Kohima, Dr Tseilhoutuo Rhutso-i ashi.

Iba ama tournament ya department balala tsünga tesendaktep tashi itshitsü aser amalitep akatsü asoshi maongka südaktsütsüla, ta pai ashi.

Sorkar mapa inyaker ya tia takartem lir aser sorkar indang department balala atema inyaksü shim, anungji state nung lenla ajanglen ajungtsü aser terenlok atema bendanga agütsür inyaksüla, ta pai

ayongzük.

IDBC Kohima president Shanavas C. IAS ajanga sorkar department ajunga dang kati ka dak tamang katempa aser temulung lemtepa alitsü aser lungjemer iba asaya ajungketba den külemi lanurtem tajungba kumdaktsütsü yaria state dangi konang bener arudaktsütsü ayongzükba liasü.

Iba sentong nung IDBC Kohima züngsem Kelhikha Kenye menden liasü, CMC Kohima Youth Pastor Zhaviu Pienyü-i sentong tenzüker sarasadem aser Rokovi Mathew Khawakhrie-i temeja ken ka tena liasü.

STATE OSANG : Tapak 2 nungi...

GPRN/NSCN ya nübur indang sorkar lir...

Modern technology kanga kera yanglua aser renloka aoba lima ka nung asenoki asen lanu putu indang tarutsü jenjang alangzükba ayutsüla aser ibaji yimjung ajanga dang alangzükettetsü, ta deputy ato kilonser, GPRN/NSCN (Mhathung, Kitovi) Jungshiwati-i ashi.

Naga nunger ajunga lungjemer memenui yimten ken o jembir ajunga den mulungtepa aliba mapa kuma inyaksü GOI dang ashitsüla, ta ashi.

Nagaland ya azüdokshiba tesem ka masü saka international mesüra national tourist destination ka kumdaktsüner aser ibaji ajanga lanurtem ajangzüksü, koba yimjung ajanga dang akoktsü.

Bangladesh aser Burma ama kidanger linük nung tang atalokba ama asen Naga lima

nunga manger-mesangwa tsünga ataloktsü akok, anungji asenoki iba ama tensa nungi kumzükba alitsü atema tasü ita mera agitsüla, ta pai ashi.

Asenoki bendanga agütsür inyakba maparen pei jurila ajangzüksü atema merakzükdakttsü. Tang India Ato Kilonser Narendra Modi-i jembiba ama inyaka negotiating parties ajak jaoka tatem kuma züluteptsü teimla lir, ta Jungshiwati-i ashi.

Sentong nung N. Kitovi Zhimomi (ato kilonser) ajanga Nagaland nung tang yimten tensa indang lemsatepa liasü.

Iba sentong nung Kheshele Achumi (Tatar) aser Aiko Club, L Khel Dipuphar nungeri ken aten, F.Pongba Konyak (A.G Secretary) ajanga melepzung o jemi aser Nochotole Yosa (Chaplin) ajanga sarasadema sentong tembang.

INDIA OSANG : Tapak 3 nungi...

PM Modi-i Israel PM dang pua alirtem...

Iba tensa süngjemtsü nungdak ta pa dang shiogo. Pua alirtem ajak chioktsü, rara anentsü aser timtemertem nem maneni teyari agütsütsü nündak ta nenshia metetdakttsügo," ta metetdakttsü.

Yaküm October ita nung Israel aser Hamas telok na tsünga rara tenzükerba sülen West Asia tesem ajaklen tensa raksaogo aser alima linüktemia rara anentsü ayongzük.

Gaza nung rara tuluba küma regional rara ka akümba mapang nung British aser French foreign minister nati Israel semdang. Rara anentsü atema Qatar nung senden mena o lemtepar.

Gaza Strip nung raradang

Palestine nunger 40,000 dak tema süogo aser Iran den Lebanon nung Hezbollah telungpurtemia Israel anema mangyangtsüsa tensa ka nung lir.

Yaküm October 7 nü Hamas teloki Israel amakdang civilian teimba ser nisung 1,200 shi tepset aser nisung 250 shi puer ao. November ita tashi nung nisung 100 shibo chiokkogo aser tang tashi nisung 110 bo Gaza nung lir. Puer aoertem nisung 80 shibo süogo ta Israel-i bilemer.

Yaküm rara tenzükerba sülen tang tashi nung Israel-i Gaza nung Hamas telungpur 17,000 shi tepsetogo, ta Israel sepai otongdar, Rear Adm. Daniel Hagari-i Brihostibarnü metetdakttsügo.

EC-i Haryana aser J&K nung...

Taoba mapang nungbo Maharashtra aser Haryana na nung assembly elections külemi dang agia liasü, ajisüaka EC-i Maharashtra, Jharkhand aser Delhi atemabo mesangdong.

"Sepaitem security nungdak apir onoki state ana nung dang election külemi agitsü lemtetogo. Tongtibang kuliji Maharashtra nung tzunglu kanga aruba aser benjung aika aliba agi state ana nung dang election agitsü lemtet," ta osangbenertem senden nung Chief Election Commissioner, Rajiv Kumar-i metetdakttsü.

2019 küm nungbo Election Commission-i Maharashtra aser Haryana naprong nung September ita nung election agitsü sangdong aser October

21 nü election agiba sülen October 24 nü vote zünga liasü. Jharkhand nunga November 2019 nung election agia liasü.

Haryana nung October 1 nü election agitsü aser Jammu & Kashmir nungbo shilem asem lemsar September 19, September 25 aser October 1 anogotem nung election agiba sülen state anaprongla nungji October 4 nü votes azüngtsü.

Taküm küm tatembanglen Maharashtra, Jharkhand aser Delhi nunga assembly elections agitsü, aser iba dak sendakba nung Kumar-i, Jammu & Kashmir aser Haryana na nung election tembangba sülen tanungba states nung election agitsü atema sangdongtsü, ta metetdakttsü.

BILEMDANGANG

"Pela alitsü ya nükjidong ka masü, nüdak keta lir."